

## Gwo jin 'Kwar ma Buulus gom 'Kwani gi Paṅ KULUUSI mo

### *Monthe Me'd mo*

<sup>1</sup> ABuulus, a'di jin karu ki she/ mo goma Kristhos jin ta'da Yesus mo ki bwa ma Arumgimis mo dhala Timuthawuus jin ta'da kam bana mo.

<sup>2</sup> E uni kun dhunu ki she/ ki dhelel dhelel mo dhali iwaḱ kun ta ku isiṅ gana/ mo eya Kristhos mo, uni kun 'kokin mo e Paṅ Kuluusi mo.

A'the e um mo dhali moṅku'th is 'peni Arumgimis jin ta'da Babam bana mo be.

### *Mon'tho ma Buulus mo gom 'Kwani kun Gami Gwo Is mo e Paṅ Kuluusi mo*

<sup>3</sup> Aman isa yempa/ 'bora Arumgimis bwa i is mo, a'di jin ta'da Baba gi Tapa Yesus Kristhos bana mo, me'd jin 'thokina aman mo gom um mo,

<sup>4</sup> haali/ aman cikina gwo gom moṅgam gwo is bum eya Kristhos jin ta'da Yesus mo dhali mo/en jin takina um mo goma ris uni 'baar mo kun dhunu ki she/ ki dhelel dhelel mo,

<sup>5</sup> haali/ mo ma 'tej kape/ a'di karkunu mo gom um e momis mo. Gom a'di yansan mo tani um cikki gwo ntwa/a/ mo e gwo jin ta gwoṅ gana/ mo, a'di jin ta gwom 'borga/ mo,

<sup>6</sup> a'di jin pu'dki'd e um mo, me'd a'di ka jinṅ gana/ diki'd e mony'ceshi 'baar mo mmodho'thkina a'di maman mo dhali mmo'twaḱkina a'diya 'twak mo - wakan e bwam um ki is bum mo 'pena tee jin

cik̄kina um a'di mo dhali mish a'di 'ban mo, a'di jin ta'da 'the ma Arungimis mo e gwoŋ gana/ mo,

<sup>7</sup> me'd jin da/arkina um a'di mo 'pena Abapraas mo, a'di jin ta'da garr bam jin enu jin mii to mo. A'di ta a'di isiŋ gana/ mo jin mii to goma K̄risthos mo gom gway bam mo

<sup>8</sup> dhali a'di torki a'di aman mo gom mo/en bum e Shi/in mo be.

<sup>9</sup> Dhali wakan 'pena tee jin cik̄kina aman a'di mo tani aman yisa dak̄kina 'tho mo mmo'tho mo gom um mo, mmodota/ dot̄ mo ki um minu 'taki 'tu'd mo ki monyith̄ bwam piti mo eya ris miin to gi shi/in gi moyuk̄ mo dhali momish gwo 'ban mo,

<sup>10</sup> mmosusa sus e bway mii kun mini ha me'd gom Tapa mo, mmo'tu'd mo ki mii kun mini 'bor a'di bwa i is mo mmokāl mamana dho'th mo goma ris miim 'borga/ mo dhali mmomara mar is mo ki monyith̄a/ Arungimis mo be.

<sup>11</sup> Dhalki um 'bitha is mo eya ris mom'bithi 'baar mo isi ki monycam piti jin ca'bki dem dem mo goma ris mo jin 'dimuwa 'dim 'kup mo dhali bwa jin 'kuçu ki 'kari'th mo ki moŋ'kuny bwa mo,

<sup>12</sup> mmociya Baba bwam 'boro'di is mo, a'di jin thumki ana mo mmonyak̄ mal pwaḵ ki uni kun dhunu ki she/ ki dhelel dhelel mo e moŋkush mo be.

<sup>13</sup> A'di 'cuḵki ana mo 'peni mom'bi'th gi mond-hurumi'd mo, mmo'ciṯh̄ ana agap mo e bampa/ gi Ya/m piti jin ena a'di mo,

<sup>14</sup> e a'di jin takina ana mo jin wanuwa wan 'ba/ mo dhali amure/ gi miinthus jin dhalkunu ana 'pen mo be.

*Mon'tu'd ma Arungimis jin 'Tu'dki'd mo*

<sup>15</sup> A'di jin bu'thki jamas ma Arungimis mo, a'di jin molu mish ki e ga 'cesh mo, a'di jin ta'da bwa nyara/ jin ṭwa/a/ ka ris to 'baar mo kun uḳu mo be.

<sup>16</sup> Haali/ e a'di mo tani aris to 'baar mo 'kokunu mo mmo/uḳ mo e momis mo dhali e mony'cesh mo, uni gun mishu ki e ga 'cesh mo, dhali uni kun molu par e ki e ga 'cesh mo, waḳki/ adhana ḳursi ma maliḳ mo walla mo jin tanu tapa mo, walla mom'bi'th kun molu gadhir mo walla moshirr mo tani - aris to 'baar mo 'kokunu mo mmo/uḳ mo e a'di mo dhali gom a'di mo be.

<sup>17</sup> A'di diki'di ṭwa/a/ ka ris to 'baar mo, dhali e a'di mo tani aris to 'baar mo tulkunu 'twa/'kup mo e a'di mo mmonṭal 'de/ mo be.

<sup>18</sup> A'di ta'da 'kan'kup gom bungwar is mo a'di jin ta'da ḳaniisa mo. A'di ta monṭel 'pen mo, a'di ta'da bwa nyara/ 'peni mowu mo, ki a'di eya ris to 'baar mo tani miḍi 'taki ta isa 'cilman gana/ mo be.

<sup>19</sup> Haali/ e a'di mo tani arisa 'tu'd kun ta ku ma Arungimis mo tani 'borkina bwa mo mmota gi mon'ko mo be.

<sup>20</sup> Dhali e a'di mo tani a'di gwamki'da gwam ki is pitiṅ gana/ mo eya ris to 'baar mo, waḳki/ to gun 'kon e mony'cesh mo walla e momis mo tani a'di karki mo ma ḳu'th is ka bas piti ki cwany'ciṭhan dhul mo be.

<sup>21</sup> Dhali um kun 'thissa/ 'kokin ka pije/ 'peni a'di mo dhali kun ta 'kup ki 'kup eya dum bum mo mmomii to kun ta thus ki thus mo tani

<sup>22</sup> a'di shwane/ gwamki'da gwam mo ki is piti mo jin ta shuman is ki jwam piti mo, ki mii gi wakan mo tani a'di miḍi tor um eya tente/ mo me'd

ku gun dhelelkin mo dhali kun dar gi thalkin mo dhali ku gun mini dar gi mo ma waḵ ibwambori a'di mo,

<sup>23</sup> ba shi/ mii a'dan 'te/ ba/, wakki/ um mini tikir 'ko mo e monḡam gwo is mo, ki monḡa'b mo dhali tel sho'k mo, yisa mmoṭi'k mo 'peni mo ma 'teṅ kape/ gi gwom 'borga/ jin cikina um mo, a'di jin cikunu aris 'kwani 'baar mo kun ukkunu mo e bwan'kwariny momis mo, dhali gom a'di mo tani aha/ jin tana Buulus warkina ka manmii a'di mo be.

### *ABuulus Miiki To mo goma Ḳaniisa mo*

<sup>24</sup> Dhali shwane/ aha/ 'kunyina bwa mo e is pem mo jin 'koshki aha/ ka nyor mo gom gway bum mo, dhali e shuman is pem mo tani aha/ thimkina a'di jin harkunu mo e mo jin tocuwa Ḳristhos bwa mo gom gway gi buṅwar is piti mo, a'di jin ta'da ḡaniisa mo.

<sup>25</sup> A'di jin warkika/ ka manmii to mo isi ki gwo jin piyi'd 'peni Arumgimis mo gom mo jin taka/ amandhu gwo mo, a'di jin cikunu aha/ mo gom um mo mmokar gwo ma Arumgimis ki a'di minu mish eya tente/ mo,

<sup>26</sup> a'di jin ta gwo ma Arumgimis jin bagu mo, a'di jin ba'kkunu ki she/ yil ka ris mo dhali mo ma nyakum yil gun tanu mo, dhali hili shwane/ a'di toṛkunu eya tente/ ki kum piti kun dhunu ki she/ ki dhelel dhelel mo.

<sup>27</sup> E uni mo tani Arumgimis ki kar bwa mo mmoṭor eya tente/ mo ka dhan mii kun wani caa e 'kwani kun 'koki ta 'Kwani Yahuuda/ mo ki monyca jin ta pa ki pa mo e gwo yansan jin cinu ki

jim bag mo, a'di jin ta'da Kristhos jin di'd e um mo, jin ta mo ma 'tej kape/ gi monyca mo be.

<sup>28</sup> A'di jin bahkina aman gwo mo mmoruma ris 'kwani 'baar ka 'dete/ 'dete/ ki gwo mo dhali tora ris 'kwani 'baar ka 'dete/ 'dete/ gwo mo eya ris moyuk mo ki aman mina 'taki dhuwa ris 'kwani 'baar ka 'dete/ 'dete/ mo ki ku gun isin mo eya Kristhos mo be.

<sup>29</sup> Haali/ gom mii yan mo tani aha/ miikina mii jin 'batha'ba'th mo, mmo/uth mo ki is jin umu'di 'baar mo, a'di jin thi'thki'da thi'th mo e aha/ mo.

## 2

<sup>1</sup> Haali/ aha/ ona bwa ki um mini mish mo mo ka dhan mii jin picirkika/ mo gom um mo dhali uni gwansan kun 'kon mo e Pa Lawudikiyya mo dhali goma ris uni 'baar mo kun 'koki par jis/em pem e mo

<sup>2</sup> ka dum buni minu 'taki 'bi'th is mo me'd jin re'dkunu uni mo mmonta' de/ mo e mo/en mo, mmota ga ris mo kun tanu pa ki pa mo gi momish mo mo 'pena duj gana/ mo dhali mony-itha/ Arungimis gwom bag yan mo a'di jin ta'da Kristhos mo.

<sup>3</sup> E a'di mo tani aris moyuk kun ishki kumma/ mo dhali mo jin nyithuwa nyith mo be.

<sup>4</sup> Aha/ ona gwo yansan mo wakan ki wathin tal 'dey kamu/ midi 'taki diki he'k um e mo ki gwo ma mak jin onu mo.

<sup>5</sup> Ba aha/ pina e bungwar is mo tani hili aha/ dina e um ki shi/in mo, mmo'kuny bwa mo mmopar miim 'boron bum kun miina um ka para po/ e mo dhali mom bum jin tela um sho'k mo ki mongam gwo is bum eya Kristhos mo be.

<sup>6</sup> Wakan, me'd jin bu'thkina uma Kristhos jin ta'da Yesus jin ta Tapa mo tani wakan 'koyi e a'di mo,

<sup>7</sup> mmotana um ka birman mo e a'di mo dhali mmonyanya um is mo e a'di mo dhali mmoṭela um sho'k mo e mongam gwo is mo, jasi me'd gwo jin ṭorkunu um mo, mmoso ki sho'k bum e mo jin 'boruwa 'bor bwa i is mo be.

*Mon'tu'd jin 'Tu'dki'd jin Ta Mondiki/ e eya Kristhos mo*

<sup>8</sup> Jiyi mo ki e ki 'bore/ mo ki wathin ṭal 'deṅ kamu/ midi diki 'kwar um ka gwapi/ mo ki gwoṅ 'kwaniṅ gangasha/ mo dhali ki gwo kun hekuwa he'k e kun 'ko bwa 'te/ mo, isi ki gwoṅ 'kwani en'thin dhamo/ mo kun luku mo, isi ki gwo ma bwa nyara/ gom gwoṅkan gi mony'cesh yan mo, dhali yisa isi ki gwo ma Kristhos mo.

<sup>9</sup> Haali/ e a'di mo tani mon'tu'd ka 'bimpil mo jin ta ji ma Arumgimis mo mmotana a'di Arumgimis mo tani ca'bki'd e buṅwar is piti mo.

<sup>10</sup> Dhali um pu'dkin mo mmo'tu'da/ 'tu'd mo e mondiki/em piti mo, a'di jin ta'da 'kan'kup goma ris montapa kun tanu mo dhala ris moshirr mo be.

<sup>11</sup> Dhali e a'di mo si'da/ um 'kokunu mo mmo'ciṭha/ munyjal yis mo ka munyjal yis jin 'ciṭhu/ ki dar gi me'd mo, ki mii jin dhalu buṅwar is gi shuman is 'pen mo e mo ma munyjal yis jin 'ciṭhu/ jin ta ji ma Kristhos mo.

<sup>12</sup> Dhali um 'kokunu mo mmokan mo nyakki a'di mo e mo jin cuṅuwa cuṅ mo dhali e mii jin 'kokunu mmocu um mis mo si'da/ nyakki a'di e mongam gwo is mo e mo/um ma Arumgimis mo, a'di jin 'de'kki a'di mo 'peni mowu mo be.

13 Dhali um, um kun 'kokin mo mmowu mo e gwon dhan mo dhali e mo ma munyal yis bum jin 'konuki 'cith um mo e shuman is bum mo tani Arumgimis a'di ki dhu ki e mmonal 'de/ nyakki a'di mo, mmodhalkina a'di ana aris gwon dhan bana 'pen mo,

14 mmo'koshkina a'di gwo jin 'kwarkunu mo jin diki'da po/ ana mo, a'di jin theke'thki'da theke'th mo gom gwonkan mo be. A'di yansan idhalkina a'di ka po/ mo, mmo'elkina a'di a'di ka musmaar mo apo/ cwany'cithan dhul mo.

15 A'di dininki mom'bi'th kun molu gadhir she/ mo dhali mom'bi'th mo, dhali a'di ki tor uni eya tente/ mo jin mina uni ta she/mm mo mmopikina a'di uni e ki mii mo be.

*Simmi To E mo kun Ta ku gi Momis mo*

16 Wakan dhalki wathin tal 'den kamu/ ki dhal bway mo mmokar gwo wak apo/ um mo e gwo jin dotuwa dot mo gom tonte/ mo dhali tompi mo walla gom mo ma yuk jin yuku ka tul 'kup mo walla goma appen this mo walla goma cim ma pesu/ mo.

17 Uni gwansan ta jasa kashira/ gom to kun mini pu'du/ mo, hili bunjwar is gi mii mo tani uni ta ku ma Kristhos mo be.

18 Dhalku/ ki dhal wathin 'den kamu/ bway mo mmothu'th um thum mo, mmodi'b um is mo mmowu is ka 'cesh mo dhali lun iman'doyu gwo mo, mmodoshkina a'di apo/ tonyjan piti mo, mmose mo ki 'pura/ 'pura/ ki dar gi 'kup mii mo ki bwa gi bunjwar is 'te/ mo.

19 Dhali yisa mmo'tela a'di e a'di jin ta'da 'Kan'kup mo. 'Peni a'di mo tani bunjwar is

ka 'bimpil thipki'da thip mo dhali re'di montal 'de/ ki mom piti gun gamu is mo dhala billa/ mo mmo'twak mo ki mon'twak jin di'd 'peni Arungimis mo be.

<sup>20</sup> Wakki/ um wukin mo nyakka Kristhos mo gom gwo ma bwa nyara/ gom gwonkan gi mony'cesh yan mo tani gomatinta 'kokina um ki mon'ko mo jin cila 'kwaniny'cesh mo? Atinta 'dapkina um 'twa/ mo ki gwonkan jin 'tashuwa 'tash bway mo?

<sup>21</sup> Uni gun o gwo mo ki: Dhalku/ to ki bu'th is ki me'd mo. Dhali, Dhalku/ to ki nyok mo. Dhali, Dhalku/ to ki ta is ki me'd mo.

<sup>22</sup> (Uni ta to gwansani 'baar mo kun minu 'ce'd sho'k mo mmomii uni mo), isi ki gwonkan gi 'kwani en'thi/ mo dhali gwo kun toru mo?

<sup>23</sup> Uni gwansan ka jin gana/ miikunu 'pena por ma pije/ mo mmoshusha du mo gom mii ma gayiin jin ta'da teten gana/ mo dhali mo jin wunu is ka 'cesh mo dhali diki 'tash bungwar is 'twa/ mo, hili uni 'koki ta to gun 'bitha she/ ki 'bi'th mo mmonona non mo 'peni mii gi bungwar is jin din ma du ki 'thup mo.

### 3

<sup>1</sup> Wakki/ um 'deku mo nyakka Kristhos mo tani simmi mii e mo gom to gun ta ku gi momis mo, e mo jin din ma Kristhos mo, e mo jin ca'bkina a'di ka bim poros ma Arungimis mo be.

<sup>2</sup> Dhuyi adum bum gom to gun 'kon e momis mo, yisa gom to gun 'kon e mony'cesh mo.

<sup>3</sup> Haali/ um wukin mo dhali mon'koki/em bum a'di bagkunu mo nyakka Kristhos eya Arungimis mo be.



<sup>4</sup> Ka Kristhos, a'di jin ta moŋ'koki/em bana minu piyu/ mo tani um si'da/ minu piyu/ mo nyakki a'di mo e monyca mo be.

*Miin Dhamo/ mo dhali Miin This mo*

<sup>5</sup> Wakan, 'koshi mii ga 'cesh jwa mo kun 'kon e um mo, kun ta mo gun miinu miinyal mo dhali mo gun 'dapu e mo dhali e kun dhunu ki 'thir 'thir mo dhali bwana thus kun pishu is mo dhali mo jin 'thotu/ bwa mo, a'di jin ta mii jin luu tompinycon mo be.

<sup>6</sup> Gom mii gwansan mo tani a'di ipu'dkin ma nyor ma Arungimis apo/ iya/ gi 'kwani kun ushi gwo ha e mo.

<sup>7</sup> E mii gwansan 'thissa/ mo tani um iikin e uni mo me'd jin 'kokina um mo e bwam uni mo be.

<sup>8</sup> Hili shwane/ dhuyi uni 'baar mo 'pen ka pije/ mo, mii ma nyor mo, dhali anyor jin deki'da deki mo, dhali mii gun dupa dupi e mo dhali mo ma thu'th 'pen jin thudhu ka sor gun walu mo dhali gwo nyogga/ 'peni 'twam bum mo.

<sup>9</sup> Dhalku/ ki ta ator ka rem 'kup mo, mmomisha um ki um dhalki mii gi buyempan dhamo/ 'pen mo ki miim piti kun botkina um mo.

<sup>10</sup> Dhali um ki hi'th miim buyempan this mo, a'di jin ukkunu mo dok/e e monyitha/ nyith mo 'ko'di jamas gi a'di jin ukki'da uk mo.

<sup>11</sup> Mmahan mo tani Wathin Griki dhali Wathi/ Yahuuda/ mini mol 'ko ki she/ mo, dhali mo ma munyjal yis jin 'citu/ mo dhali mo ma munyjal yis jin 'konuki 'cith mo, dhali wathi/ jin diki wal 'twan Griki mo dhali jin mii mii kun kankama kankam mo, dhali cinkina/ jin yolu mo dhali wathi/ jin di ki 'kus

mo, hili aKristhos a'di ta to 'baar mo dhali e ana 'baar mo be.

<sup>12</sup> Wakan, hithi ma mii gwansan mo, me'd uninj gana/ kun kwanykin ma Arumgimis mo, um kun dheelkin mo dhali kun enu mo, mii gi wakansan mo kun ta mii kun kwojuwa kwo'c e i is mo dhali mii kun miinu ki bwanjush mo dhali mii gun dhunu is ki gwa'd mo dhali mii kun miinu ka 'thup e mo dhali mii kun 'kuçu bwa ki 'kari'th mo,

<sup>13</sup> mmothona thon me'di 'ko'd ka rem 'kup mo dhali, wakki/ wathin 'denj kamu/ ta gi gwo walla/ apowa kamunj kamu/ mo tani dhali adhal gi miinthus 'pen ka rem 'kup mo ma. Me'd mii jin dhalkina Tapa uma mure/ miinthus bum 'pen mo tani um si'da/ mini mii dhalka mure/ miinthus 'pen mo.

<sup>14</sup> Dhali apowa ris mii gwansani 'baar mo tani hithi mo/en mo, a'di jin dekki'da ris to 'baar mo mmonjal 'de/ mo ki 'bor gana/ mo ki dar gi mo ma dhadharmu'th mo.

<sup>15</sup> Dhali dhalki monku'th is ma Kristhos bway mo mmojiya dum bum mo e a'di ka jinj gana/ jin yukunu um mo e bunjwar isa 'de/ mo, dhali mmoçi mo jin 'boruwa 'bor bwa i is mo.

<sup>16</sup> Dhalki gwo ma Kristhos ca'ba'd e um ki ca'b 'pempaņ gana/ mo me'd mii jin torkina um gwo mo dhali mmorogom gwo ka rem 'kup mo ka ris moyuk mo, dhali me'd jin yukkina um gway mo mmoka mo jin miinuwa mii e mo dhali gway jin manjwa manj mo dhali gway jin yuku gom to gi shi/ in mo ki mii jin 'boruwa 'bor bwa i is eya dum bum goma Arumgimis mo be.

<sup>17</sup> Dhali ma eya ris to gunn kun mina um imii

mo tani e gwo gun ona um mo walla mii gun miina um mo tani miiyi aris to 'baar mo ki gway gi Tapa Yesu mo mmoçi mo jin 'boruwa 'bor bwa i is ka Arumgimis mo, a'di jin ta'da Baba e a'di mo be.

*Mo jin Nyaku To Mii mo e Moŋ'ko 'Kwani gi Moŋ'koki/en This mo*

<sup>18</sup> Up 'dapi ki me'd ki gwo gi ikathim bum mo me'd gwo jin ha me'd e Tapa mo.

<sup>19</sup> 'Kwaniŋ gwas, eni up bum mo ma, dhali dhalki uni ki 'cwar mo.

<sup>20</sup> Uçiya, hayi gwo gi icim e mo dhali gwo gi ikwan e mo goma ris to 'baar mo, haali/ mii yansan mo tani a'di ki 'bor Tapa bwa mo.

<sup>21</sup> Ibaba, dhalku/ ki rukuny uçim bum ka nyor mo, isi ciki/ uni mini 'koki 'bitha du is mo.

<sup>22</sup> Çiŋkina/ kun yoluwa, hayi gwo e eya ris to 'baar mo gi uni gwansan kun ta tapam bum mo e mony'cesh mo, yisa ki mii kun miinu e jis/en 'kwani mo mmo'bor 'kwani bwa mo 'te/ yisa, hili ka dun tal 'de/ mo mmoko/ Tapa mo be.

<sup>23</sup> Ma eya risa tu'c bum gunn kun miina um mo tani miiyi a'di ki bwan gana/ mo me'd jin miina um Tapa to mo, dhali yisa gom 'kwaniya,

<sup>24</sup> mmomishkina um 'peni Tapa mo ki um mini bu'th mal mo me'd tom bum jin ish kumma/ mo. Um miiki Tapa Kristhos to mo be.

<sup>25</sup> Haali/ amanthu'th to mii mo tani a'di minu doku/ tonthus apo/ a'di jin miikina a'di mo dhali mii jin miinu ka gwar 'de/ yisa di'da.

## 4

<sup>1</sup> Itapa, miiyi çin kinam bum kun yola um ki mii ma kar/e mo dhali ki dar gi mii ma gwar 'de/ mo,

mmomisha um si'da/ ki um ta gi Tapam bum e momis mo.

<sup>2</sup> Tikiri moshok tel mo e mon'tho mo mmotimkina uma tim mo gom a'di ki mo jin 'boruwa 'bor bwa i is mo

<sup>3</sup> dhali 'thoyi mo gom am si'da/ ka Arungimis midi 'taki ka'd amana campur gom gwo mo, mmobah gwo ma Kristhos jin cinu ki jim bag mo gom gway gi a'di jin dikika/ eya sijin mo

<sup>4</sup> ki aha/ mina 'taki tor a'di eya tente/ me'd jin miga/ 'taki tor a'di ka ba/.

<sup>5</sup> Boti ki mii ki is bum gana/ ki yuk yuk mo 'kupki uni gwansan kun 'kona pije/ mo mmowara tee is mo.

<sup>6</sup> Dhalki gwom bum kun ona um isa yempa/ mo ta gwo ma 'the mo dhali kun cemesa cemes ka 'donkoro/ mo, wakan ki um mini mish mo mo gwo kun mina um ka ba/ ithok 'kwani 'baar ka 'dete/ 'dete/ mo.

*Kwalany 'Te/ Ba. Monthe Me'd mo*

<sup>7</sup> Tikikus a'di midi tor uma ris to 'baar mo kun miika/ mo. A'di ta'da kam bana jin enu mo dhali ta a'di isinj gana/ mmomii to mo dhali agarr jin ta'da manmii to e Tapa mo be.

<sup>8</sup> Aha/ hashkina a'di i um mo gom isi gwonj 'kup gwo yan gana/ mo ki um mini mish mo mo gom 'kom bam jin 'kona am mo dhali ki a'di midi 'taki 'bi'th uma dum bum is mo,

<sup>9</sup> dhali nyakki a'di mo si'da/ a'di jin ta'da Unisimus mo, a'di jin ta isinj gana/ mo, dhali jin ta'da kam bana jin enu mo, a'di jin ta jan 'de/ gi is bum gana/ mo. Uni mini tor uma ris to 'baar mo kun buthi mo mo e mo yan mo.

10 Aristarkus jin ta'da agarr pem jin nyakkaa/ ca'b eya sijn mo tani theki um me'd mo dhala Markus jin ta nam ma Barnaaba mo (isi gwo gom a'di jin bu'thkina um mmoye'thkunu um sho'k ki gwo mo - wakki/ a'di midi pu'dku/ i um mo tani buthi a'di mo ma),

11 dhala Yesuu/ a'di jin yukunu gway ka Yustus mo. 'Kwani gwansan uni ta jasi uni kun 'cithkunuwa munyal yis mo e bwaman uni kun nyakkaa/ tu'c mii mo gom Bampa/ ma Arumgimis mo, dhali uni ita momalas pem mo be.

12 Abapraas, a'di jin ta jan tal 'de/ ki is bum mo, jin ta'da manmii to goma Kristhos jin ta'da Yesus mo tani theki um me'd mo, isa yempa/ mmoka um e mo ka dun dara'd mo e mon'thom piti mo, ki um mini 'taki dosh mo me'd ku gi isin mo dhali mmomish mo ki isi mish gana/ 'baar mo a'di jin ta bwa ma Arumgimis mo be.

13 Haali/ aha/ tana aman/o gwo gom a'di mo haali/ a'di miiki'da tu'c jin 'batha'ba'th mo gom um mo dhali gom uni gwansan kun 'kon e Pa Lawudikiyya mo dhali e Pa Hiyarabulis mo be.

14 ALuuka, a'di jin ta'da hakiim jin enu mo dhala Dimas mo theki um me'd mo.

15 Ciki monthe me'd pem eya wak kun 'kon e Pa Lawudikiyya mo dhali eya Nimpaas mo dhala kaniisa jin di'd e gu'b ma yim mo.

16 Dhali ki gwo yansan denkunu e mo e bwam um mo tani dhalki a'di si'da/ denu e mo eya kaniisa gi Pa Lawudikiyya mo be dhali hili ki 'bore/ ki um ki den gwo yan e si'da/ gwo 'peni Pa Lawudikiyya mo.

17 Dhali oya Arkibbus gwo mo ki: Hili ki 'bore/ ki

/e mini thim to mii mo a'di jin bu'thkina /e 'peni  
Tapa mo.

<sup>18</sup> Aha/ Buulus i'kwarkina gwo monthe me'd  
yan ki me'd pem gana/ mo. Kayi amakk<sub>ki</sub>yam pem  
e jin dekk<sub>ku</sub>nu aha/ mo. A'the midi di gom um mo.

## **Gwo Ma Arumgimis Uduk New Testament and OT Portions**

copyright © 2005 SIM International

Language: Uduk

Translation by: SIM International

### **Uduk New Testament and OT Portions**

Published by Bible Alliance Mission, 1983.

. If you are interested in obtaining a printed copy, please contact the SIM at [www.sim.org](http://www.sim.org).

. This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-10-02

---

PDF generated using Haiola and XeLaTeX on 18 Apr 2025 from source files dated 29 Jan 2022

f734434c-b6bd-5d21-abc6-692c3842e034